



KOSOVO SPECIALIST CHAMBERS  
DHOMAT E SPECIALIZUARA TË KOSOVËS  
SPECIJALIZOVANA VEÇA KOSOVA

**Numri i lëndës:** KSC-BC-2020-06

**Prokurori i Specializuar kundër Hashim Thaçit, Kadri Veselit,  
Rexhep Selimit, dhe Jakup Krasniqit**

**Vendosi:** Trupi Gjykesues II

Gjykatës Çarls L. Smith III, Kryegjykatës

Gjykatës Kristof Barte

Gjykatës Ginel Metro

Gjykatës Fergal Gejnor, gjykatës rezervë

**Administratore:** Fidelma Donlon

**Data:** 15 korrik 2024

**Gjuha:** Anglishte

**Klasifikimi:** Publik

---

**Vendim mbi Rishikimin e Rregullt të Paraburgimit të Rexhep Selimit**

---

**Prokurores së Specializuar**

Kimberli P. Uest

**Mbrojtjes së Hashim Thaçit**

Lluka Mishetiç

**Mbrojtësit të Viktimave**

Sajmon Loz

**Mbrojtjes së Kadri Veselit**

Ben Emerson

**Mbrojtjes së Rexhep Selimit**

Xhefri Roberts

**Mbrojtjes së Jakup Krasniqit**

Venkatesvari Alagenda

**TRUPI GJYKUES II** i Dhomave të Specializuara të Kosovës (“Trupi Gjykues”), në bazë të nenit 41(6), (10), dhe (12) të Ligjit nr. 05/L-053 për Dhomat e Specializuara dhe Zyrën e Prokurorit të Specializuar, dhe rregullave 56(2) dhe 57(2) të Rregullores së Procedurës dhe të Provave para Dhomave të Specializuara të Kosovës, lëshon këtë vendim.

## I. HISTORIKU PROCEDURAL

1. Historiku procedural në lidhje me rishikimin e rregullt të paraburgimit të Rexhep Selimit (“z. Selimi ” ose “i akuzuari”) është shtjelluar gjerësisht në vendimet e mëparshme në lidhje me të njëjtën pikë. Ngjarjet relevante që nga rishikimi i pesëmbëdhjetë i paraburgimit të z. Selimi më 15 maj 2024 (“Vendimi i Pesëmbëdhjetë mbi Paraburgimin”) përfshijnë si vijon.<sup>1</sup>
2. Më 24 qershor 2024, Zyra e Prokurorit të Specializuar (“ZPS”) dorëzoi parashtrimet për vazhdimin e paraburgimit të z. Selimi (“Parashtrimet e ZPS-së”).<sup>2</sup>
3. Mbrojtja e z. Selimi (“Mbrojtja e Selimit”) nuk u përgjigj ndaj Parashtrimeve të ZPS-së.

## II. PARASHTRIMET

4. ZPS-ja kërkon që të vazhdohet paraburgimi i z. Selimi sepse, që nga rishikimi i fundit i paraburgimit të z. Selimi, nuk ka pasur ndryshim material të rrethanave që do të kishte ndikim në faktorët në mbështetje të domosdoshmërisë dhe arsyeshmërisë së paraburgimit.<sup>3</sup> Përkundrazi, ZPS-ja parashtron se ndryshimet

---

<sup>1</sup> F02310, Trupi Gjykues, *Vendim mbi Rishikimin e Rregullt të Paraburgimit të Rexhep Selimit*, 15 maj 2024.

<sup>2</sup> F02402, Prokurori i Specializuar, *Parashtrim i Prokurorisë në lidhje me Rishikimin e Rregullt të Paraburgimit të Rexhep Selimit*, 24 qershor 2024.

<sup>3</sup> Parashtrimet e ZPS-së, para. 1, 6.

materiale të fundit, së bashku me vazhdimin e gjykimit rrisin domosdoshmërinë dhe arsyeshmërinë e paraburgimit të z. Selimi.<sup>4</sup>

### III. DISPOZITAT LIGJORE PËRKATËSE

5. Dispozitat ligjore përkatëse për të vendosur në lidhje me këtë pikë përcaktohen në nenin 41(6), (10), dhe (12) dhe rregullat 56 dhe 57, dhe janë shtjelluar gjerësisht në vendimet e mëhershme.<sup>5</sup> Trupi Gjykes do t'i zbatojë këto standarde në këtë vendim.

### IV. DISKUTIM

6. Qëllimi i rishikimit të paraburgimit çdo dy muaj sipas nenit 41(10) është që të përcaktohet nëse ekzistojnë ende arsyet për mbajtje në paraburgim.<sup>6</sup> Ndryshimi i rrethanave, ndonëse nuk është përcaktues, merret parasysh nëse shtrohet para trupit gjykes përkatës, ose *proprio motu*.<sup>7</sup>

#### A. KRITERET E NENIT 41

##### 1. Dyshimi i bazuar

7. Sa i përket standardit për vazhdimin e paraburgimit, neni 41(6)(a) kërkon ekzistencën e dyshimit të bazuar se personi i paraburgosur ka kryer vepër penale

---

<sup>4</sup> Parashtrimet e ZPS-së, para. 1, 6.

<sup>5</sup> *Shih për shembull*, F00580, Gjykatësi i Procedurës Paraprake, *Vendim në lidhje me Rishqyrtimin e Vendimit të Kthyer mbi Paraburgimin dhe për Rishikimin e Rregullt të Mbajtjes në Paraburgim të Rexhep Selimit ("Vendimi i Tretë mbi Paraburgimin")*, 26 nëntor 2021, konfidencial, para. 20, me referenca të mëtejshme. Versioni i redaktuar publik u lëshua më 8 dhjetor 2021, F00580/RED.

<sup>6</sup> IA022/F00005, Paneli i Gjykatës së Apelit, *Vendim mbi Apelin e Hashim Thaçit kundër Vendimit për Rishikimin e Paraburgimit*, 22 gusht 2022, konfidencial, para. 37. Versioni i redaktuar publik u lëshua më të njëjtën ditë, IA022/F00005/RED.

<sup>7</sup> IA007/F00005, Paneli i Gjykatës së Apelit, *Vendim mbi Apelin e Rexhep Selimit kundër Vendimit për Rishikimin e Paraburgimit*, 1 tetor 2021, konfidencial, para. 14. Versioni i redaktuar publik u lëshua më të njëjtën ditë, IA007/F00005/RED.

që përfshihet në juridiksionin e Dhomave të Specializuara ("DHS"). Ky është kusht *sine qua non* për vlefshmërinë e vazhdimit të paraburgimit të personit të paraburgosur.<sup>8</sup>

8. ZPS-ja parashtron se ende përmbushet kriteri i nenit 41(6)(a). Për mendimin e ZPS-së nuk ka pasur asnjë ndryshim që do të mund të cenonte konstatimet e Gjykatësit të Procedurës Paraprake se vazhdon të ekzistojë dyshimi i bazuar mirë se z. Selimi ka kryer vepra penale që përfshihen në juridiksionin e DHS-së.<sup>9</sup>

9. Trupi Gjykses vë në dukje se, në bazë të nenit 39(2), Gjykatësi i Procedurës Paraprake konstatoi se ekzistonte dyshimi i bazuar mirë se z. Selimi është përgjegjës penalisht për disa krime kundër njerëzimit (përndjekje, burgosje, akte të tjera çnjerëzore, torturë, vrasje e paligjshme dhe zhdukje me forcë) dhe krime lufte (ndalim arbitrar, trajtim mizor, torturë dhe vrasje e paligjshme) sipas neneve 13, 14(1)(c) dhe 16(1)(a).<sup>10</sup> Gjithashtu, Gjykatësi i Procedurës Paraprake konstatoi se dyshimi i bazuar mirë është vërtetuar edhe në lidhje me akuzat e reja të ngritura nga ZPS-ja kundër z. Selimi, të paraqitura në ndryshimet e kërkuara që i

---

<sup>8</sup> *Ngjashëm*, ECtHR, *Merabishvili v. Georgia* [GC], no. 72508/13, [Judgment](#), 28 November 2017, para. 222.

<sup>9</sup> Parashtrimet e ZPS-së, para. 7.

<sup>10</sup> F00026 Gjykatësi i Procedurës Paraprake, *Vendim mbi Konfirmimin e Aktakuzës kundër Hashim Thaçit, Kadri Veselit, Rexhep Selimit dhe Jakup Krasniqit*, 26 tetor 2020, rreptësisht konfidencial dhe *ex parte*, para. 521(a)(i)-(ii). Versioni i redaktuar konfidencial u dorëzua më 19 nëntor 2020, F00026/CONF/RED. Versioni i redaktuar publik u dorëzua më 30 nëntor 2020, F00026/RED. Prokurori i Specializuar parashtrroi aktakuzën e konfirmuar në F00034, Prokurori i Specializuar, *Parashtrim i Aktakuzës së Konfirmuar dhe Kërkesave lidhur me Të*, 30 tetor 2020, konfidencial, me Shtojcën 1, rreptësisht konfidenciale dhe *ex parte*, dhe Shtojcat 2-3, konfidenciale; F00045/A03, Prokurori i Specializuar, *Aktakuza e Redaktuar më Tej*, 4 nëntor 2020; F00134, Prokurori i Specializuar, *Version me më pak Redaktime i Aktakuzës së Redaktuar KSC-BC-2020-06/F00045/A02*, 4 nëntor 2020, 11 dhjetor 2020, konfidencial. Versioni i redaktuar më tej i aktakuzës së konfirmuar u dorëzua më 3 shtator 2021, rreptësisht konfidencial dhe *ex parte* (F00455/A01), me versionin e redaktuar konfidencial (F00455/CONF/RED/A01) dhe versionin e redaktuar publik (F00455/RED/A01). Më 17 janar 2022, Prokurori i Specializuar dorëzoi versionin e korrigjuar konfidencial me më pak redaktime të aktakuzës së konfirmuar, F00647/A01.

janë bërë Aktakuzës.<sup>11</sup> Këto konstatime u bënë mbi bazën e një standardi më të lartë se ai i dyshimit të bazuar që kërkohet sipas nenit 41(6)(a).<sup>12</sup>

10. Në mungesë të ndonjë rrethane të re materiale që do të ndikonte në konstatimet e mësipërme, Trupi Gjykses konstaton se vazhdon të ekzistojë dyshimi i bazuar se z. Selimi ka kryer krime që përfshihen në juridiksionin lëndor të DHS-së sipas nenit 41(6)(a) dhe (10).

## 2. Domosdoshmëria e paraburgimit

11. Në lidhje me arsyet për vazhdimin e paraburgimit, neni 41(6)(b) përcakton tri arsye (rreziqe) në bazë të të cilave mund të konstatohet se paraburgimi është i domosdoshëm: (i) rreziku i arratisjes; (ii) rreziku i pengimit të procesit; ose (iii) rreziku i kryerjes së krimeve të tjera.<sup>13</sup> Këto arsye duhet të jenë të “artikulueshme” në kuptimin që duhet të specifikohen me hollësi duke iu referuar informacionit ose provave përkatëse.<sup>14</sup> Në përcaktimin nëse ekziston ndonjë prej

---

<sup>11</sup> F00777, Gjykatësi i Procedurës Paraprake, *Vendim mbi Konfirmimin e Ndryshimeve në Aktakuzë*, 22 prill 2022, rreptësisht konfidencial dhe *ex parte*, para. 183. Versioni i redaktuar konfidencial (F00777/CONF/RED), versioni i redaktuar publik (F00777/RED) dhe versioni konfidencial me më pak redaktime (F00777/CONF/RED2) u dorëzuan, përkatësisht, më 22 prill 2022, 6 maj 2022 dhe 16 maj 2022. Ndryshimet e kërkuara janë dhënë në hollësi në para. 11. Aktakuza e konfirmuar e ndryshuar u dorëzua pastaj nga ZPS-ja më 29 prill 2022, rreptësisht konfidenciale dhe *ex parte* (F00789/A01), me versionin e redaktuar konfidencial (F00789/A02) dhe versionin e redaktuar publik (F00789/A05). Më 30 shtator 2022, ZPS-ja dorëzoi aktakuzën e konfirmuar të ndryshuar më tej (“Aktakuza e Konfirmuar”), rreptësisht konfidenciale dhe *ex parte* (F00999/A01), me versionin e redaktuar konfidencial (F00999/A02) dhe versionin e redaktuar publik (F00999/A03), siç kishte urdhëruar Gjykatësi i Procedurës Paraprake (F00895, Gjykatësi i Procedurës Paraprake, *Vendim mbi Mocionin për Mangësi në Formën e Aktakuzës së Ndryshuar*, 22 korrik 2022, para. 49(e); F00993, Gjykatësi i Procedurës Paraprake, *Vendim mbi Kërkesën e Prokurorisë për Ndryshimin e Aktakuzës*, 29 shtator 2022, konfidencial, para. 24(b); versioni i redaktuar publik u dorëzua në të njëjtën ditë.

<sup>12</sup> *Shih për shembull*, F00372, Gjykatësi i Procedurës Paraprake, *Vendim mbi Rishikimin e Paraburgimit të Rexhep Selimit* (“Vendimi i Dytë mbi Paraburgimin”), 25 qershor 2021, konfidencial, para. 19. Versioni i redaktuar publik u lëshua më 30 qershor 2021, F00372/RED.

<sup>13</sup> Cf. ECtHR, *Buzadji v. the Republic of Moldova* [GC], no. 23755/07, [Judgment](#), 5 July 2016 (“*Buzadji v. the Republic of Moldova* [GC]”), para. 88; ECtHR, *Zohlandt v. the Netherlands*, no. 69491/16, 9 February 2021, [Judgment](#), para. 50; ECtHR, *Grubnyk v. Ukraine*, no. 58444/15, 17 September 2020, [Judgment](#), para. 115; ECtHR, *Korban v. Ukraine*, no. 26744/16, 4 July 2019, [Judgment](#), para. 155.

<sup>14</sup> Neni 19.1.31 i Kodit të Procedurës Penale të Kosovës i Vitit 2022, Ligji nr. 08/L-032 jep këtë përcaktim për termin “artikulueshëm”: “pala e cila paraqet informacionin apo provën duhet të specifikojë në

arsyeve të përcaktuara në nenin 41(6)(b) për paraburgimin e një personi, standardi i zbatueshëm është më i ulët se pashmangshmëria, por më i lartë se thjesht mundësia që ndonjë prej rreziqeve të materializohet.<sup>15</sup>

(a) Rreziku i arratisjes

12. ZPS-ja parashtron se z. Selimi vazhdon të përmbushë standardin e zbatueshëm të rrezikut të arratisjes. Konkretisht, ZPS-ja pretendon se z. Selimi: (i) është vënë në dijeni të akuzave kundër tij dhe mundësisë së një dënimi të rëndë, nëse shpallet fajtor; dhe (ii) përmes procesit të nxjerrjes së materialit që po vazhdon, ai është duke marrë më shumë njohuri për provat kundër tij. ZPS-ja shton se vazhdimi dhe thjeshtimi i provave të ZPS-së do të thotë se mundësia e marrjes së një dënimi të gjatë me burgim po bëhet më konkrete.<sup>16</sup> ZPS-ja parashtron më tej se z. Selimi tani është i vetëdijshëm” për provat e forta lidhur me sjelljen e kohëve të fundit që çoi në modifikimin e kushteve të paraburgimit, e cila, sikurse ka pranuar Trupi Gjykses, mund të cenojë ose zhvlerësojë konstatimet e mëparshme se ai ka bashkëpunuar me autoritetet përkatëse”.<sup>17</sup> Së fundi, ZPS-ja argumenton se të gjithë faktorët e mësipërm duhet të merren parasysh në kontekst të konstatimeve të mëparshme lidhur me mjetet për të udhëtuar të z. Selimi.<sup>18</sup>

13. Trupi Gjykses ka shqyrtuar argumentet e ZPS-së, duke pasur parasysh fazën aktuale të procesit, dhe nuk gjykon se vazhdimi i gjykimit dhe as thjeshtimi i provave nga ZPS-ja përbëjnë faktorë të rinj relevant. Në lidhje me argumentin e ZPS-së se rreziku i arratisjes shtohet duke pasur parasysh se z. Selimi tani është i

---

detaje informatën apo provën në të cilën mbështetet”. *Shih gjithashtu* IA003/F00005, Paneli i Gjykatës së Apelit, *Vendim mbi Apelin e Rexhep Selimit kundër Vendimit për Lirim të Përkohshëm* (“Vendimi i Parë i Apelit mbi Paraburgimin e Selimit”), 30 prill 2021, konfidencial, para. 43. Versioni i redaktuar publik u lëshua në të njëjtën ditë, IA003/F00005/RED.

<sup>15</sup> Vendimi i Parë i Apelit mbi Paraburgimin e Selimit, para. 40.

<sup>16</sup> Parashtrimet e ZPS-së, para. 9.

<sup>17</sup> Parashtrimet e ZPS-së, para. 9 i referohen F02060, Trupi Gjykses, *Vendim mbi Rishikimin e Rregullt të Paraburgimit të Rexhep Selimit*, 15 janar 2024, para. 13.

<sup>18</sup> Parashtrimet e ZPS-së, para. 9.

vetëdijshëm se ZPS-ja ka mbledhur prova të forta për sjelljen e fundit që çoi në modifikimin e kushteve të paraburgimit, Trupi Gjykses thekson se z. Selimi tashmë përballet me akuza lidhur me krime ndërkombëtare themelore, dhe provat e reja për pengim nuk përbëjnë ndryshim të madh të rrethanave që të përligjin një konstatim të ndryshëm lidhur me rrezikun e arratisjes. Rrjedhimisht, Trupi Gjykses rikonfirmon konstatimin e vet të mëparshëm se ZPS-ja nuk ka vërtetuar pretendimin e “mundësisë mjaftueshëm reale” që i akuzuari do të arratiset nëse lirohet.<sup>19</sup>

14. Trupi Gjykses konstaton se, megjithëse rreziku i arratisjes nuk mund të përjashtohet plotësisht asnjëherë, vazhdimi i paraburgimit të z. Veseli aktualisht nuk mund të përligjet mbi bazën e rrezikut të arratisjes sipas nenit 41(6)(b)(i).

(b) Rreziku i pengimit të ecurisë së procesit të DHS-së

15. ZPS-ja parashtron se z. Selimi vazhdon të paraqesë rrezik për pengimin e procesit. Ajo parashtron se vazhdojnë të ekzistojnë faktorët e rrezikut që identifikoi Gjykatësi i Procedurës Paraprake, siç konfirmon Trupi Gjykses, konkretisht: (i) postet e kaluara dhe aktuale me ndikim në Kosovë të z. Selimi, përfshirë si ministër i Punëve të Brendshme dhe si i zgjedhur në Kuvendin e Kosovës, do t'i mundësonin që të ndikojë në rrjetin e tij mbështetës dhe ta mobilizojë atë; (ii) atmosfera e vazhdueshme e frikësimit të dëshmitarëve dhe ndërhyrjes në procedura penale kundër ish-anëtarëve të Ushtrisë Çlirimtare të Kosovës (“UÇK”); dhe (iii) ecuria e procesit ku z. Selimi vazhdon të njihet me provat në të cilat bazohen akuzat e rënda kundër tij.<sup>20</sup>

---

<sup>19</sup> *Shih* Vendimin e Pesëmbëdhjetë mbi Paraburgimin, para. 13-14; *Shih gjithashtu* Vendimi i Parë i Apelit mbi Paraburgimin e Selimit, para. 44.

<sup>20</sup> Parashtrimet e ZPS-së, para. 10-11.



16. ZPS-ja shton se në Kosovë vazhdon atmosfera e përgjithshme e ndërhyrjes ndaj dëshmitarëve në lidhje me këtë çështje, për të cilën gjë Paneli i Gjykatës së Apelit është pajtuar se është faktor relevant.<sup>21</sup>

17. Së fundi, ZPS-ja parashtron se z. Selimi ka marrë informacion të ndjeshëm, midis të tjerash, në lidhje me dëshmitarët që ZPS-ja synon t'i thërrasë.<sup>22</sup> ZPS-ja shton se ajo ka theksuar më parë rrezikun që ky informacion të bëhet i njohur për publikun, nëpërmjet të akuzuarit, dhe se ky rrezik është realizuar tashmë sepse z. Selimi ka shkelur urdhrat e Trupit Gjykses, ndër të tjera, duke zbuluar identitetet e dëshmitarëve të mbrojtur dhe/ose duke ua shpërndarë përmbajtjen konfidenciale të dëshmive personave që e kanë vizituar në objektin e paraburgimit të DHS-së çka rezultoi në modifikimin prej Trupit Gjykses të kushteve të paraburgimit të z. Selimi.<sup>23</sup>

18. Trupi Gjykses ka konstatuar tashmë dhe rithekson se: (i) postet me ndikim, të kaluara dhe të tashme, të z. Selimi në Kosovë, përfshirë si ministër i Punëve të Brendshme dhe si i zgjedhur në Kuvendin e Kosovës, do t'i mundësonin të ushtrojë ndikim në rrjetin e tij të mbështetësve dhe ta mobilizojë atë;<sup>24</sup> (ii) ekziston atmosfera e vazhdueshme e frikësimit të dëshmitarëve dhe ndërhyrjes në

---

<sup>21</sup> Parashtrimet e ZPS-së, para. 12.

<sup>22</sup> Parashtrimet e ZPS-së, para. 13-14.

<sup>23</sup> Parashtrimet e ZPS-së, para. 14-16 i referohen F01977, Trupi Gjykses, *Vendim i Mëtejshëm mbi Kërkesën Urgjente të Prokurorisë për Modifikimin e Kushteve të Paraburgimit për Hashim Thaçin, Kadri Veselin, dhe Rexhep Selimin* ("Vendimi mbi Modifikimin e Kushteve të Paraburgimit"), 1 dhjetor 2023, para. 41, 51-53, 55-60, 62-78, 84(c).

<sup>24</sup> *Shih për shembull*, F00179, Gjykatësi i Procedurës Paraprake, *Vendim mbi Kërkesën e Rexhep Selimit për Lirim të Përkohshëm* ("Vendimi i Parë mbi Paraburgimin"), 22 janar 2021, konfidencial, para. 37. Versioni i redaktuar publik u lëshua më 26 janar 2021, F00179/RED; Vendimi i Dytë mbi Paraburgimin, para. 40; Vendimi i Tretë mbi Paraburgimin, para. 33; F00802, Gjykatësi i Procedurës Paraprake, *Vendim mbi Rishikimin e Rregullt të Paraburgimit të Rexhep Selimit* ("Vendimi i Katërt mbi Paraburgimin"), 13 maj 2022, konfidencial, para. 31. Versioni i redaktuar publik u lëshua më 24 maj 2022, F00802/RED; F01213, Gjykatësi i Procedurës Paraprake, *Vendim mbi Rishikimin e Rregullt të Paraburgimit të Rexhep Selimit* ("Vendimi i Shtatë mbi Paraburgimin"), 17 janar 2023, konfidencial, para. 23-24. Versioni i redaktuar publik u lëshua më 18 janar 2023, F01213/RED; Vendimi i Pesëmbëdhjetë mbi Paraburgimin, para. 18.



procedura penale kundër ish-anëtarëve të UÇK-së;<sup>25</sup> dhe (iii) procesi vazhdon dhe z. Selimi vazhdon të njihet me provat në të cilat bazohen akuzat e rënda kundër tij.<sup>26</sup>

19. Siç është vënë në dukje më parë, për shkak të natyrës së gjykimit aktual, emrat dhe të dhënat personale të disa dëshmitarëve tejet të ndjeshëm janë nxjerrë dhe do të vazhdojnë të nxirren për Mbrojtjen e Selimit, dhe si rezultat do të bëhen të njohur për një numër të madh personash, përfshirë të akuzuarin. Kjo, nga ana e vet, rrit rrezikun që informacioni i ndjeshëm në lidhje me dëshmitarët të bëhet i njohur për publikun përpara se këta dëshmitarë të dëshmojnë. Në këtë kontekst, lirimi i të akuzuarit duke pasur në zotërim informacion të ndjeshëm nuk do të ndihmonte mbrojtjen efektive të dëshmitarëve që nuk kanë dëshmuar ende.<sup>27</sup>

20. Sa i takon sjelljes së z. Selimi në objektin e paraburgimit të DHS-së, Trupi Gjykses rikujton konstatimin e vet se duket se z. Selimi nxori informacionin e privilegjuar për palë të treta të paautorizuara.<sup>28</sup> Kjo sjellje mbështet dhe përforcon konstatimin e Trupit Gjykses se z. Selimi përbën rrezik për pengim të ecurisë së procesit të DHS-së.

21. Rrjedhimisht, Trupi Gjykses vjen në përfundim se vazhdon të ekzistojë rreziku që z. Selimi të pengojë ecurinë e procesit të DHS-së, siç përcaktohet në nenin 41(6)(b)(ii).

---

<sup>25</sup> *Shih për shembull*, Vendimin e Parë mbi Paraburgimin, para. 42; Vendimin e Dytë mbi Paraburgimin, para. 41; Vendimin e Tretë mbi Paraburgimin, para. 34; Vendimin e Katërt mbi Paraburgimin, para. 32; Vendimin e Shtatë mbi Paraburgimin, para. 23-24; Vendimin e Pesëmbëdhjetë mbi Paraburgimin, para. 18.

<sup>26</sup> *Shih për shembull*, Vendimin e Katërt mbi Paraburgimin, para. 33; F00979, Gjykatësi i Procedurës Paraprake, *Vendim mbi Rishikimin e Rregullt të Paraburgimit të Rexhep Selimit*, 19 shtator 2022, konfidencial, para. 29. Versioni i redaktuar publik u lëshua më 30 shtator 2022, F00979/CONF/RED; F01111, Gjykatësi i Procedurës Paraprake, *Vendim mbi Rishikimin e Rregullt të Paraburgimit të Rexhep Selimit*, 18 nëntor 2022, konfidencial, para. 27. Versioni i redaktuar publik u lëshua më të njëjtën ditë, F01111/RED; Vendimi i Shtatë mbi Paraburgimin, para. 23-24; Vendimi i Pesëmbëdhjetë, para. 18.

<sup>27</sup> *Shih për shembull*, Vendimin e Shtatë mbi Paraburgimin, para. 24; Vendimin e Pesëmbëdhjetë mbi Paraburgimin, para. 19.

<sup>28</sup> Vendimi mbi Modifikimin e Kushteve të Paraburgimit, para. 35-37.

(c) Rreziku i kryerjes së krimeve të tjera

22. ZPS-ja parashtron se vazhdon të ekzistojë rreziku që z. Selimi të kryejë krime të tjera. Konkretisht, ZPS-ja pretendon se faktorët që u vlerësuan për të përcaktuar nëse ekziston rreziku i pengimit të procesit sipas nenit 41(6)(b)(ii) janë gjithashtu relevantë për shqyrtimin nëse ekziston rreziku që z. Selimi të kryejë krime të tjera në qoftë se z. Selimi do të lirohej.<sup>29</sup> ZPS-ja parashtron se ky rrezik merr rëndësi shtesë për shkak të informacionit të ndjeshëm që z. Selimi vazhdon të marrë meqenëse gjykimi ka filluar,<sup>30</sup> dhe duke marrë parasysh se z. Selimi ka zbuluar informacion konfidencial.<sup>31</sup> ZPS-ja shton se krimet kundër njerëzimit dhe krimet e luftës për të cilat akuzohet janë tejet të rënda dhe pretendohet se janë kryer në bashkëpunim me të tjerë si dhe personalisht nga z. Selimi.<sup>32</sup>

23. Trupi Gjykes kujton konstatimin e vet në Vendimin e Pesëmbëdhjetë mbi Paraburgimin se rreziku që z. Selimi të kryejë krime të tjera vazhdon të ekzistojë.<sup>33</sup> Trupi Gjykes thekson se që nga Vendimi i Pesëmbëdhjetë mbi Paraburgimin nuk ka pasur asnjë informacion të ri që do të mund të çonte në një përfundim të ndryshëm. Gjithashtu, Trupi Gjykes konstaton se të njëjtët faktorë që u morën parasysh në lidhje me rrezikun e pengimit janë relevantë për analizimin e rrezikut që z. Selimi të kryejë krime të tjera.<sup>34</sup>

24. Trupi Gjykes gjykon se, duke marrë parasysh të gjithë faktorët, ekziston rreziku që z. Selimi të kryejë krime të tjera siç përcaktohet në nenin 41(6)(b)(iii).

---

<sup>29</sup> Parashtrimet e ZPS-së, para. 17-18.

<sup>30</sup> Parashtrimet e ZPS-së, para. 20-21.

<sup>31</sup> Parashtrimet e ZPS-së, para. 21.

<sup>32</sup> Parashtrimet e ZPS-së, para. 19.

<sup>33</sup> Vendimi i Pesëmbëdhjetë mbi Paraburgimin, para. 23.

<sup>34</sup> *Shih më lart*, para. 18-20; Vendimin e Pesëmbëdhjetë mbi Paraburgimin, para. 23.

### 3. Përfundim

25. Trupi Gjykses vjen në përfundim se në këtë moment nuk ka informacion të mjaftueshëm për të arsyetuar konstatimin se z. Selimi mund t'i ikë drejtësisë. Megjithatë, Trupi Gjykses është bindur, në bazë të standardit relevant, se ekziston rreziku që z. Selimi të pengojë ecurinë e procesit të DHS-së ose të kryejë krime të tjera kundër atyre që perceptohen si kundërshtarë të UÇK-së, përfshirë dëshmitarët që kanë dhënë ose mund të japin dëshmi në këtë çështje dhe/ose kanë për t'u paraqitur para DHS-së. Trupi Gjykses do të vlerësojë më poshtë nëse këto rreziqe mund të trajtohen në mënyrë të duhur me çfarëdo kushte për lirimin e z. Selimi.

#### B. MASAT ALTERNATIVE NDAJ PARABURGIMIT

26. ZPS-ja parashtron se asnjë masë alternative nuk zvogëlon mjaftueshëm rreziqet sipas nenit 41(6)(b) që paraqet z. Selimi. ZPS-ja kujton se Trupi Gjykses ka konstatuar më parë se rreziqet e pengimit të procesit dhe kryerjes së veprave të tjera penale mund të kontrollohen në mënyrë efektive vetëm në objektin e paraburgimit të DHS-së.<sup>35</sup> ZPS-ja shton se që nga Vendimi i Pesëmbëdhjetë mbi Paraburgimin nuk ka ndryshuar asgjë që do të përlligjte një vlerësim të ndryshëm. Përkundrazi, sjellja e z. Selimi paraqet rrezik më të lartë se kurrë, sikurse dëshmohet nga modifikimi prej Trupit Gjykses të kushteve të paraburgimit duke vendosur kushte më të rrepta.<sup>36</sup>

27. Gjatë marrjes së vendimit nëse një person duhet të lirohet apo të mbahet në paraburgim, Trupi Gjykses duhet të shqyrtojë masat alternative për parandalimin

---

<sup>35</sup> Parashtrimet e ZPS-së, para. 22-25.

<sup>36</sup> Parashtrimet e ZPS-së, para. 26.

e rreziqeve në nenin 41(6)(b).<sup>37</sup> Neni 41(12) përcakton disa faktorë që duhet të merren parasysh për të siguruar praninë e të akuzuarit në gjykim, për të parandaluar përsëritjen e veprës penale apo për të siguruar kryerjen me sukses të procesit penal. Në këtë aspekt, Trupi Gjykses rikujton se paraburgimi duhet të vazhdojë vetëm nëse nuk janë të disponueshme në mënyrë të arsyeshme masa alternative më të buta të cilat do të zvogëlonin mjaftueshëm rreziqet e përcaktuara në nenin 41(6)(b).<sup>38</sup> Për këtë arsye, Trupi Gjykses duhet të shqyrtojë të gjitha masat e arsyeshme alternative që mund të vendosen dhe jo vetëm ato që parashtrajnë palët.<sup>39</sup>

28. Në lidhje me rrezikun e pengimit të ecurisë së procesit të DHS-së dhe kryerjes së krimeve të tjera, Trupi Gjykses konfirmon se asnjë nga kushtet e propozuara më parë e as asnjë nga masat e përcaktuara në nenin 41(12) të urdhëruara *proprio motu*, nuk mund të zvogëlojnë mjaftueshëm rreziqet ekzistuese në këtë fazë të procesit.<sup>40</sup> Gjithashtu, Trupi Gjykses konstaton se masat në fuqi në objektin e paraburgimit të DHS-së, të para në tërësi, ofrojnë garanci të forta kundrejt vizitave dhe komunikimeve të pamonitoruara me anëtarët e familjes dhe vizitorët e miratuar paraprakisht, me synimin për të zvogëluar rrezikun e pengimit të

---

<sup>37</sup> Sa i përket detyrimit për të shqyrtuar "masa alternative", shih KSC-CC-PR-2017-01, F00004, Dhoma e Specializuar e Gjykatës Kushtetuese, *Aktvendim mbi Referimin e Rregullores së Procedurës dhe të Provave Miratuar nga Plenarja më 17 mars 2017, Dhomës së Specializuar të Gjykatës Kushtetuese sipas Nenit 19(5) të Ligjit nr. 05/L-053 për Dhomat e Specializuara dhe Zyrën e Prokurorit të Specializuar ("Aktvendimi i DHSGJK-së i Datës 26 prill 2017")*, 26 prill 2017, para. 114. Shih gjithashtu ECtHR, *Buzadji v. the Republic of Moldova* [GC], para. 87 *in fine*; ECtHR, *Idaurov v. Russia* [GC], para. 140 *in fine*.

<sup>38</sup> Aktvendimi i DHSGJK-së i Datës 26 prill 2017, para. 114; KSC-CC-PR-2020-09, F00006, Dhoma e Specializuar e Gjykatës Kushtetuese, *Aktvendim mbi Referimin e Ndryshimeve të Rregullores së Procedurës dhe të Provave Miratuar nga Plenarja më 29 dhe 30 prill 2020, 22 maj 2020*, para. 70. Shih gjithashtu ECtHR, *Buzadji v. the Republic of Moldova* [GC], para. 87 *in fine*; ECtHR, *Idaurov v. Russia* [GC], para. 140 *in fine*.

<sup>39</sup> Vendimi i Parë i Apelit mbi Paraburgimin e Selimit, para. 86.

<sup>40</sup> Shih për shembull, Vendimin e Tretë mbi Paraburgimin, para. 72; IA015/F00005, Paneli i Gjykatës së Apelit, *Vendim mbi Apelin e Rexhep Selimit kundër Vendimit në lidhje me Rishikimin e Vendimit të Kthyer të Paraburgimit dhe Rishikimin e Rregullit të Paraburgimit ("Vendimi i Tretë i Apelit mbi Paraburgimin e Selimit")*, 25 mars 2022, konfidencial, para. 33-44, 48-52, 61. Versioni i redaktuar publik u lëshua më të njëjtën ditë, IA015/F00005/RED; Vendimi i Katërt mbi Paraburgimin, para. 59; Vendimi i Shtatë mbi Paraburgimin, para. 39; Vendimi i Katërmbëdhjetë mbi Paraburgimin, para. 31.

procesit dhe të kryerjes së krimeve të tjera.<sup>41</sup> Për më tepër, ato ofrojnë një mjedis të kontrolluar ku një shkelje e mundshme e konfidencialitetit mund të identifikohet dhe/ose të parandalohet me lehtësi.<sup>42</sup>

29. Duke pasur parasysh sa më lart, Trupi Gjykses konstaton se komunikimet e z. Selimit mund të kufizohen vetëm përmes kornizës së kufizimit të komunikimit që zbatohet në objektin e paraburgimit të DHS-së, përfshirë masat që Trupi Gjykses urdhëroi,<sup>43</sup> në një mënyrë që zvogëlon mjaftueshëm rreziqet e pengimit të procesit dhe të kryerjes së krimeve të tjera.<sup>44</sup> Në këto rrethana, Trupi Gjykses konstaton se nuk ka alternativë ndaj vazhdimit të paraburgimit të z. Selimi që mund të parandalojë rreziqet sipas nenit 41(6)(b)(ii) dhe (iii).

#### C. ARSYESHMËRIA E PARABURGIMIT

30. ZPS-ja parashtron se, duke marrë parasysh të gjithë faktorët, paraburgimi i z. Selimi vazhdon të jetë i arsyeshëm.<sup>45</sup> Në lidhje me këtë, ZPS-ja i referohet konstatimit të Trupit Gjykses se: (i) kundër z. Selimi janë ngritur dhjetë akuza për krime të rënda ndërkombëtare, dhe pretendohet se ai ka luajtur rol të rëndësishëm në përgatitjen e tyre; (ii) nëse shpallet fajtor, ai mund të dënohet me burgim të gjatë; (iii) procesi është kompleks; (iv) rreziqet sipas nenit 41(6)(b) nuk mund të zvogëlohen në mënyrë të mjaftueshme me masa më të buta se paraburgimi; (v) ekziston atmosfera e frikësimit të dëshmitarëve; dhe (vi) gjykimi ka filluar.<sup>46</sup>

---

<sup>41</sup> *Shih për shembull*, Vendimin e Tretë mbi Paraburgimin, para. 72; Vendimi i Tretë i Apelit mbi Paraburgimin e Selimit, para. 33-44, 48-52, 61; Vendimin e Katërt mbi Paraburgimin, para. 59; Vendimin e Shtatë mbi Paraburgimin, para. 38; Vendimin e Pesëmbëdhjetë mbi Paraburgimin, para. 29.

<sup>42</sup> *Shih për shembull*, Vendimin e Tretë mbi Paraburgimin, para. 61; Vendimin e Tretë të Apelit mbi Paraburgimin e Selimit, para. 42; Vendimin e Katërt mbi Paraburgimin, para. 59; Vendimin e Shtatë mbi Paraburgimin, para. 38; Vendimin e Pesëmbëdhjetë mbi Paraburgimin, para. 29.

<sup>43</sup> *Shih* Vendimin mbi Modifikimin e Kushteve të Paraburgimit, para. 51-53, 55-60, 62-78, 84(c).

<sup>44</sup> *Shih për shembull*, Vendimin e Tretë mbi Paraburgimin, para. 61; Vendimin e Tretë të Apelit mbi Paraburgimin e Selimit, para. 42; Vendimin e Katërt mbi Paraburgimin, para. 59; Vendimin e Shtatë mbi Paraburgimin, para. 38; Vendimin e Pesëmbëdhjetë mbi Paraburgimin, para. 30.

<sup>45</sup> Parashtrimet e ZPS-së, para. 27, 29.

<sup>46</sup> Parashtrimet e ZPS-së, para. 28.

31. Trupi Gjykses rikujton se arsyeshmëria e vazhdimit të paraburgimit të të akuzuarit duhet të vlerësohet bazuar në faktet e secilës çështje dhe sipas veçorive të saj në kohën kur bëhet vlerësimi.<sup>47</sup> Sipas vlerësimit të Trupit Gjykses, veçoritë në këtë çështje përfshijnë: (i) kundër z. Selimi janë ngritur dhjetë akuza për krime të rënda ndërkombëtare në të cilat pretendohet se ai ka luajtur rol të rëndësishëm;<sup>48</sup> (ii) z. Selimi mund të dënohet me burgim të gjatë nëse shpallet fajtor; (iii) rreziqet sipas nenit 41(6)(b)(ii) dhe (iii) nuk mund të zvogëlohen me zbatimin e masave të propozuara dhe/ose të çfarëdo mase tjetër;<sup>49</sup> (iv) çështja kundër z. Selimi është komplekse;<sup>50</sup> (v) atmosfera frikësimit të dëshmitarëve e përshkruar më lart; dhe (vi) gjykimi po vazhdon.

32. Duke pasur parasysh sa më lart, si dhe faktin se vazhdon të ekzistojë rreziku i pengimit të procesit dhe kryerjes së krimeve të tjera, asnjë prej të cilëve nuk mund të zvogëlohet mjaftueshëm me zbatimin e masave të arsyeshme alternative, Trupi Gjykses konstaton se vazhdimi i paraburgimit të z. Selimi për dy muaj të tjerë është i domosdoshëm dhe i arsyeshëm në rrethanat e veçanta të kësaj çështjeje.

33. Sidoqoftë, Trupi Gjykses thekson se z. Selimi tashmë është mbajtur në paraburgim për një periudhë të konsiderueshme kohore dhe gjykimi i kësaj çështjeje ka mundësi të zgjasë. Sikurse u vu në dukje më herët nga Trupi Gjykses, kjo kërkon që Trupi Gjykses dhe palët të kenë veçanërisht parasysh që të sigurojnë kryerjen sa më të shpejtë të gjykimit. Trupi Gjykses do të vazhdojë të monitorojë në çdo fazë të këtij procesi nëse vazhdimi i paraburgimit është i domosdoshëm dhe i arsyeshëm.

## V. VENDIM

---

<sup>47</sup> Vendimi i Shtatë mbi Paraburgimin, para. 42 (me referenca të mëtejshme).

<sup>48</sup> Aktakuza e Konfirmuar, para. 7-9, 32, 39-40, 44-47, 49, 52, 55-57, 176-177.

<sup>49</sup> *Shih më lart*, para. 29.

<sup>50</sup> Vendimi i Tretë mbi Paraburgimin, para. 79 (me referenca të mëtejshme); Vendimi i Pesëmbëdhjetë mbi Paraburgimin, para. 32.

34. Për arsyet e lartpërmendura, Trupi Gjykues:

- a) **URDHËRON** vazhdimin e paraburgimit të z. Selimi; dhe
- b) **URDHËRON** ZPS-në të dorëzojë parashtrime në lidhje me rishikimin e ardhshëm të paraburgimit të z. Selimi jo më vonë se **të premten, 23 gusht 2024 (ora 16:00)** me përgjigjet dhe kundërpërgjigjet sipas afateve të përcaktuara në rregullën 76.

\_\_\_\_\_/nënshkrimi/\_\_\_\_\_  
\_\_\_\_\_

**Gjykatës Çarls L. Smith, III**

**Kryegjykatës**

E hënë, 15 korrik 2024

Në Hagë, Holandë.